

74. INSTRUCTIE BIJ PROVISIE VOOR DEN BURGEMEESTEREN VAN DEN
HAGHE VAN TGUNDT ZIJ TE DOEN SULLEN HEBBEN ACHTERVOLGENDE
DISPOSITIYFF VAN DEN OCTROYE VAN DER CONINCKLIJKE MAJESTEYT.

1560 juli 6

- <I> Eerst zullen bailliu, schoudt, burchghemeesteren voorn. mitten
schepenen van den Haghe nomineren den tresorier, fabryck ende
exumeesters van den Haghe, bedienders van excijsen ende
anderen incompsten van den Haghe, den waerdijns, mitten anderen
diensten daer aen clevende, omme daer vuyt geeligeert te worden

bij mijnen heer den stadthouder ofte in zijnder genadens absentie bij den president van Hollandt, die dat ancommende jaer dienen zullen.

- ⟨II⟩ Sullen oick bailliu, schoudt, burghmeesteren ende schepenen van den Haghe nomineren de kerckmeesteren, heylige-geestmeesteren, wesenmeesteren, getijdenmeesteren, huys sitten ende leproesmeesteren omme over te leveren mijnen voorn. heer den stadthouder ofte president omme daer vuyt te eligeren die het toecommende jaer sullen dienen.
- ⟨III⟩ Sullen voorts die schoudt, burghemeesteren mitten schepenen eligeren ende stellen alle die deeckens ende hooftmans van gildens, cappelmeesters, pesthuysmeesters, vinders, brootweghers, waeckers, brantmeesters, emmermaeckers, boden als boschdraghers, keurmeesters, tonsters, yck ende juystmeesters, sackdraghers, cruyers ende generalicken allen anderen diensten tcorpus van den Hage behouftich zijnde.
- ⟨IV⟩ Ende sullen eenen yegelycken van heuren subiecten in den zijnen van allen den voorss. diensten moegen constringeren te doene rekeninge, bewijs ende reliqua van heuren bewindt ende administratie.
- ⟨V⟩ Des sal den officier den gheenen dient behoert den behoerlicken eedt affnemen in presentie van den voorss. burgmeesteren ende schepenen van den Haghe.
- ⟨VI⟩ Die bailliu, schoudt, burchmeesteren voorscreven ende schepenen sullen oyck bij advyse van den vroetscappe (alst noot es) maicken generalicken alle de keuren ende ordonnantien de policie ende twelvaeren van den Haghe angaende als opte brandt ende brantschouwe, de beschouwinge van den straeten, plaeten, wateren, wegghen, kaeden buyten ende binnen den Haeghe, opt broot, koorne, vleysch, visch, byer, wijn ende andere provanden, coopmanschappen, maten, gewichten ende dyergelijcken, stellende daerop alsulcken boeten ende breucken, groot ende cleyn, als hemluyden goetduncken sal ende als tot hyer toe bij den bailliu schoudt ende schepenen van den Haghe gedaen es geweest.
- ⟨VII⟩ Des sullen de burghemeesteren gehouden wesen tot coste van tcorpus van den Haghe te sustineren de processen die vuyt saicke van dien sullen moeghen rijzen buyten coste van den officiers indient hemluyden goetdunckt ende dat bij advyse van den schepenen bevonden wordt zulcxs te behoeren.

- <VIII> Sullen oick voorss. burghemeesteren last hebben trecht van den Haghe te bewaeren, allen den processen te beleyden zoe bij justicie als middele van accorde, mits daer over roupende ofte tselve leggende in deliberacie van schepenen voorss. ende oeck vroetscappe eest noot.
- <IX> Den burchmeesteren voorn. sullen scerp toesicht hebben totten incommen ende vuytgeven van den goeden van den Haghe, oick mede van allen wercken ende reparatien, hoedanich die wesen moegen; ende bysundere scerp toesicht hebben opte politie, neeringe ende welvaeren van der vleckke van den Haghe, Sceveninghe, Eyckenduynen ende van de Nyeuweveen.
- <X> Ende als angaende de justicie daer en sullen de burchmeesteren voorn. nyet mede gemoyt zijn, maer sullen den bailliu ende den schoudt elcx in den zijnen daer mede laten bewarden, die hemluyden daer mede zullen moyen ende nyet mitten saicken van den voors. burchmeesteren. Dan sullen burchmeesteren voorn. den schepenen van den Haghe moegen assisteren als zij te doene zullen moeghen hebben in saicken den burgeren heurluyder wesen, den privilegijen, costumen, politien van den Haghe oft anderen swaeren saicken beroerende.
- <XI> Den burchmeesteren sullen heur camere apart hebben ende houden ende acces hebben tot allen tijden in schepenenecamere ende vergaderinge van den vroetschap te commen.
- <XII> Die voorss. burchmeesteren sullen voor wedden hebben gelijk in anderen steden tot een tabbaert laicken alle jaers neghen Carolus guldens, zullen voorts gelijk in anderen steden genyeten ende proffyteren gelijk den schepenen in allen verhuuyeringen van excijsen ende anderen verpachtingen van goeden tCorpus van den Haghe angaende in vercoepinge van huysen, landen, erven ende anders bij decreete van den Haghe, van ijcken, maten, tonnen, gewichten ende voorts van allen anderen saicken de politie van den Haghe angaende, welverstaende, dat den jegenwoordigen schoudt van den Haghe in zijne emolumenten ende prouffijten geduyerende zijnen pacht geenszins geprejudiceert ofte te cort gedaen sal worden. Onder stont gescreven; aldus geordonneert bij den Prince van Oranguen, Grave van Nassau etc. als stadthouder-generael etc. bij advyse van den president ende andere van Conincklijcke Majesteyts raede ende reeckeninghe over Hollandt, Zelandt ende West-Vrieslandt upten sesten July anno XVc ende tsestich; ondergteyckent Guillaume de Nassau. Daer onder stont noch gescreven. Ter ordonnantie van mijnen heeren

de Prince van Oranguen voors. als stadhouder van Hollandt, Zeelandt ende Vrieslandt heb ick Barthout Ernst, griffyer van den Hove van Hollandt voors. dit mede onderteyckent opten Vlen July 1560 als boven. Ondergeteyckent B. Ernst.

Naar O.A. 608 fol. CLXXXIX - CXCI verso.